

應天府志卷十五

山川志

扶輿之氣融結而成以流以峙奠茲  
江表山川兢而  
輝川爭而媚人文之萃民利寔興作山川志

上元

神烈山舊名鍾山在東北朝陽門外志云東連青龍  
山西接青溪南有鍾浦下入於秦淮北接雒亭山  
相傳山有三氣今爲

孝陵嘉靖中

詔改今名例非郡所得特志其形勝大觀山周迴

六十里高一百五十八丈諸葛亮對吳大帝云鍾

山龍盤指此漢末有秣陵尉蔣子文逐盜死事於

此孫吳改曰蔣山又名金陵山又名紫金山晉元

帝未渡江時望氣者云山常有紫氣又名北山即

南齊周顒隱處孔璋作北山移文者兩峯秀起北

一峯最高其巔有一人泉僅容一勺挹之不竭循

泉西為黑龍潭相傳曾有龍現今深廣不數尺其

上為太子岩又名曰昭明讀書臺岩西有峴曰栽

松輿地志云蔣山木少林木東晉令刺史羅暹栽

松百株宋時令刺史栽三千株下至郡守各有差

曰陽梅岩曰頭陀緣蔣祠有玉澗王安石詩澗水

無聲遠竹流竹西草木弄春柔茅簷相對坐終日

一鳥不鳴山更幽其崇岡曰孫陵何遜詩昔在零

陵厭神器若無依逐兔爭先捷精鹿競因機呼噏

開伯道叱咤掩江畿豹變分奇畧虎視肅戎威長

蛇虺巴漢驥馬絕淮淝交戰無內禦重門豈非扉

成功舉已棄身德悔而蓬水龍忽東駕首蓋乃西

歸焉來已未夕氣代非微苔石疑文字刑墳失

是非山鶯空曙會離月自秋暉銀海終無浪金鳧

會不飛間寂今如此望望沾人衣宋九日臺在焉

峰之秀者曰屏風嶺後曰桂嶺碧石青林幽阻深

靚其東有道士塢即陳宣帝禮玄靖臧兢處道卿

巖宋葉清臣字道卿嘗遊其間八功德水在其下

舊志云在悟真庵後謂一清二冷三香四柔五甘

六淨七不鱧八蠲痲自梁以來嘗取供御案梅摯

亭記梁天監中有胡僧曇隱寓錫於此山中乏水

有麗眉叟相謂曰予山龍也知師渴飲措之無難

俄而一沼湧出後有西僧至云本域八池已失其

一竭彼盈此洪武間遷寺東麓舊池就涸從寺東

馬鞍山下通出宣德間水竭不到至正統元年又

旱忽湧出如初宋曾拯詩數斛供厨替八珎穿松

漱石瑩心神中涵百衲烟霞氣不染齊梁歌舞塵

西折為桃花塢道光泉宋熙寧間僧道光所劬宋

熙泉陟左有東澗石邁古跡編云梁處士劉訐隱

居之所尤精釋典嘗講於鍾山諸寺因卜築宋

原寺東澗有絲馬之菜萁塢金陵志云蔣山南

平陂中舊有菜萁園宋道士陸靜修餌菜萁于此

山之南有岡曰獨龍阜峯曰玩珠梁釋實誌墓在  
焉起浮圖五級今移置東麓塔之西有洗鉢池落

又池又有猿驚鶴怨二谷則好事者所加東山巔  
有定心石山之半有井其泉與江潮盈縮名曰應

潮井酉陽雜俎云蔣山有應潮井在半山之間俗

傳與江潮相應嘗有破舡朽板自井中出貞觀中  
有牧兒汲水得杉板長尺餘上有朱漆字曰吳赤

烏二年豫章王子駿之船古跡編亦云應潮井在

蔣山古頭陀寺後舊志所云若此井與江近地脉

相通或有之餘不免附會南麓又有霹靂溝宋王

安石詩霹靂溝西路柴荆四五家憶曾騎款段隨

意入桃花

有曲水晉海西公疏以宴百僚宋時以

三月三日祓除於此謝惠連詩四時著平分三春

稟融爍遲遲和景婉天天園桃灼携朋斯郊野昧

旦辭塵郭斐雲興翠嶺芳飈起華薄解轡偃崇丘

藉草遶回壑陰渚羅時敷託波泛輕鴈山之支迤

運而南隱然竅起之為龍廣山唐地理志云江南  
道其名山衡廬茅蔣朱紫陽亦云天下山皆發源  
于岷山蔣山實其脉之盡者自孫吳建都以來便  
稱佳麗名賢勝跡茲山為特富累朝崇尚虛無琳  
宮梵宇亦窮極華麗蓋七十餘所今無復存者亦

據載籍志其名云劉劭別墅

在鍾嶺之南聚石蓄

水以為棲息朝士雅素者多從之游

招隱館

在西

岷下宋元嘉中文帝築以居雷次宗

會宗堂

晉朝

謝尚齊朱應吳苞孔嗣之梁阮孝緒劉孝標並隱

於此唐大曆中處士韋渠牟亦隱此地號遺名

顏真卿為題其堂

兩翁軒

洪覺範詩序云悟真庵

西踈竹林間蒼崖千尺歲久折裂余數行山中至  
此未嘗不徘徊庵僧為開高軒向之因詩云水邊

脩竹纔堪數林外蒼崖已半頽

定林寺

宋文帝元

嘉十六年

建

草堂寺 在山之西齊周顒建以居僧

慧約即顒舊隱所 王安石詩云偶向松關覓舊題

野人休誦北山移丈夫出處非無意猿鶴從來自

不知大愛敬寺

在山之西梁武帝建江表上已多

遊於此梁武帝詩云周天地縈帶極長川稜層

疊嶂遠迤邐磴道懸李廷勳詩溪雲藏寺靜風磬

摘林鳴臺古松多折碑荒字欲平

### 太平興國寺

在獨龍阜梁天監十三年即寶誌塔前建開善寺唐

乾符中改為寶公院南唐後主又改為開善道場

至宋太平興國五年增修詔改今名崔峒開善寺

詩山殿秋雲裏香烟出翠微客尋朝磬食僧背夕

陽歸下界千門見前朝萬事非着心無送目設炎

幕依依靜壇梁侍中周捨立武帝問壇如何剡曰

風不鳴條雲無膚寸鹿巾黃帔甚多白簡朱衣罕

至明慶寺 在鍾山南八功德水前 秀峰院 即寶林

寺梁大建中武帝與寶公同遊此山因以同行為

額唐會昌中廢楊吳太和中復建後改為秀峯院

有琪樹在法堂前梅摯詩云影共金田潤香隨碧

月流遠疑元帝植近想寶公遊建炎間兵火燬翠

微寺 在寶珠峯頂 悟真庵 前近八功德水 定林庵

宋安王石讀書處米元章榜曰昭文齋 崇禧萬壽

寺元泰定四年建 又有七佛庵霜筠庵雪竹庵宋

熙寺寺西百餘武田白蓮庵庵前有白蓮池彈琴  
石南麓有朱湖洞茲山之可紀者南齊時崔慧景  
遣千餘人魚貫緣山西巖夜下鼓譟臺軍震恐侯  
景反邵陵王綸率西豐公大春等馬步三萬發自  
京口直據鍾山景黨大駭陳大寶元年齊軍潛至  
鍾山踰龍尾皆此地

沈約應詔詩靈山紀地德險

峭資岳靈終南表秦觀少室邇王城翠鳳翔淮海  
襟帶繞神垵北阜何其峻林薄杳葱青○發地多  
奇嶺千雲非一狀合沓共隱天參差互相望鬱律

構丹巘峻增起青嶂勢隨九疑高氣與三山壯

〔淖鍾山紫芝觀詩〕繫丹仙宅下清磬落春風雨過

芝田長雲深藥徑重古房清磴接虛殿紫烟濃鶴

駕何時去遊人自不逢〔蘇軾詩〕到任席不煖居愁

空惘然好山無十里遺恨恐他年欲款南朝寺同

登北郭船朱門收画戟紺宇出青蓮夾路蒼髯古

迎人翠麓偏龍腰蟠故國烏爪寄層巔竹杪飛華

屋松根泣細泉峯多巧障日江遠欲浮天畧約橫

秋水浮屠插暮烟歸來踏人影雲細月娟娟

覆舟山在太平門內與鎮山支脉相連兩山之間土

中皆石蓋山之骨

以狀若覆舟故名又名龍山又

名龍舟山劉宋時以山臨玄武湖改玄武山陳高

祖與北齊兵大戰即此舊有甘露亭瑤臺閔風亭

山陰藏水井今皆廢宋孝武詩束髮好怡衍弱冠

頗流薄素想終勿傾聿求果丘壑層峯亘天維曠

渚綿地絡逢臯列神苑遭壇樹仙閣松塏含青暉

荷源煜丹爍川界沫遊鱗岩庭響鳴鶴齊王融詩

道勝業茲遠心閒地能闡桂崦鬱初栽蘭臯坦將

闕虛簷對長嶼高軒臨廣液芳草列成行嘉樹紛

如積流風轉罔逕清烟汎喬石日泊山照紅松暎

水華碧暢哉人外賞遲遲眷西夕

鷄鳴山在覆舟山西南北臨玄武湖舊名鷄籠山即

雷次宗開館處劉宋時黑龍見玄武湖又曰龍山

國朝於山巔築臺置儀表以測玄緯名觀象臺亦名

欽天山左右列十廟繚以朱垣其東麓爲鷄鳴寺

普濟塔在焉

祇闍山在鷄籠西舊有祇闍寺

石灰山在西二十里王導從元帝渡江建幕府於此  
初名幕府山壘多石居人煨以取灰更今名北濱  
大江東與直瀆諸山接為建業門戶魏人至瓜步  
文帝登此山觀望形勢齊師至鍾山龍尾陳霸先  
自率麾下出幕府山齊人大潰山有五峯南曰北  
固峽中有石洞幽邃中峯上有仙人臺虎跑泉西  
北峯曰夾蘿亦名翠蘿上有達摩洞喬宇詩綠江  
村落帶林臯幕府秋晴爽氣高蒼嶺烟嵐開日馭  
紫霄宮闕瀉雲濤地逢多景詩無暇客是同心興  
亦豪道眼看来誰了了笑看塵海一鴻毛

直瀆山在北二十五里吳將甘寧墓在此或云有王  
氣吳王皓惡而鑿其後為直瀆山因名

大壯觀山與直瀆接陳宣帝起大壯觀於此

觀音山在觀音門外北濱大江西引幕府諸山東連  
臨沂衡陽諸山形如錯繡皆懸岩削壁共捍大江  
真天造地設也

臨沂山在東北四十里臨沂故城在其西南  
雉亭山與臨沂接齊武帝遊鍾山射雉於此

衡陽山去雉亭東北五里許朔法師居此有衡陽神  
女來聽講後爲此山之神因名

攝山與衡陽接山多藥草可以攝生有水注江乘浦  
入攝湖即秦始皇所從渡江者而志云江乘浦在  
縣西北豈有兩江乘浦哉考之在東北者爲江乘  
浦故縣以江乘名在西南者爲江寧浦故縣以江  
寧名圖考誤又名繖山齊時隨石勢大小鑿佛像  
千餘名千佛嶺江總碑明僧紹居士子仲璋爲臨  
沂令於西峯石壁與度禪師鑿造石佛齊文惠太

子豫章竟陵諸王繒飾之每一岩一佛或十餘者  
惟嶺下一巖五丈內坐釋伽傍立菩薩二皆四丈  
八尺不知何年盡斷其首復續下爲天開巖沈傳

師徐鉉張稚圭祖無擇諸題名尚存嶺傍有白乳  
泉俱山勝處陳慶之大破齊師虜蕭軌即此陳后

王同江總遊山詩時宰蟠溪心非關狎竹林鷺岳

青松繞雜峯白日沉天迥浮雲細山空明月深摧

殘枯影樹零落古藤陰霜月夜鳥去風露寒猿吟

自可盡出俗詎是願袖簪唐權德輿詩攝山標勝

紀暇日詣想矚祭庭於路深綠遠雲出曲重樓回  
樹杪古像作山腹人遠水木清地幽蘭桂馥層臺  
聳金碧絕頂摩淨綠下界誠可悲南軒紛在目焚  
香入古殿待月出深竹稍覺天籟寂白陽人事促  
宗雷此相遇偃仰隨所欲清論月輪低閑吟茗花  
熟一生如土梗萬慮皆桎梏永願事清師窮年此  
棲宿顧况詩明微君舊宅陳後主題詩跡在人亡  
處山空月滿時寶瓶無破響道樹有低枝已是傷  
離客仍逢靳尚祠

畫石山在攝山東岩下有石穴曰花洞

落星山在攝山北吳時建樓

吳都賦曰茅茨旅乎落星之樓

木廬山在東北二十里江乘記云山陽有鍾乳穴

白山在東北三十里南與神烈接山產白石可爲碑

礎梁散騎常侍蕭載有田十餘頃江乘之白山築

室并居不入籬門者十載今城西南近幽棲山有

小山亦名白山

竹堂山在東七十五里西與白山接

雲穴山在竹堂東南有石穴天欲雨則雲氣蓊然  
湯山在雲穴東山不甚高且童湯泉出其下禽鳥入  
輒死以灌草木則愈鮮茂

大城山在東七十里西與鴈門接

鴈門山在東六十里山勢連亘類北地鴈門東北有  
溫泉輿地志云白山鴈門竹堂並連帶建康東北

綿亘三四十里

崗山在東二十五里

青龍山在東南三十里山產石材質甚良都人競取

為碑礎前有蘼蕪澗

金陵故事云齊處士劉瓛居

此為儒林之宗至四十未婚其友為娶王氏乃就  
澗折蘼蕪而去

彭城山在青龍南

祈澤山在彭城西

宋王安石詩駕言東南遊午飯投

僧館山白梅蒞長林黃柳芽短苓蒼沙際來畧勺  
桑間斷春映一川明雪消千壑漫魚隨竹影浮鳥  
悞人聲散玩物豈能留于時吾自懶

符堅山在東南六十里北連大城山謝玄破秦歸謝

安問其方略玄指此山曰此若符堅駐軍之山

石跪山在東南二十里始皇鑿秦淮此是其斷處

土山與石跪近山無岩石晉謝安嘗遊陟於此以擬

會稽東山又名小東山即與玄圍棋賭墅處唐李

白詩不向東山久薔薇幾度花白雲還自散明月

落誰家又我今携謝妓長嘯絕人群欲報東山客

開關掃白雲

張山在東南三十里

丁山在東南四十里

方山在東南四十五里山頂平如鏟一名天印山秦

淮經其下齊武帝嘗欲于此起離宮期勝新林苑

徐孝嗣曰繞黃山欵牛首乃盛漢之事遂止徐嗣

徽兵至秣陵齊人自方山進及倪塘齊王融詩巡

躅望登年張飲臨秋縣日羽鏡霜潯雲旗落風甸

四瀛良在目八寓宛如見小臣竊自嘉預奉栢梁

燕

獅子山以形名在北二十里晉元帝初渡江見山嶺

緜延遠接石頭以比北地盧龍故其初名盧龍山

遠望松檜行列宛若狻猊雄峙都城之北

聖祖嘗伏兵大破陳友諒於此山下喬宇詩江堰萬

家開迤邐石頭千堞逸崔嵬

馬鞍山以形名在西北與獅子接

四望山在定淮門與獅子馬鞍相屬西臨大江蘇峻

反溫嶠築壘于此以逼賊今以清涼寺後爲四望

者非

石頭山在西四里即楚金陵邑吳晉時江在石頭下  
爲險要必爭之地上築城嘗以腹心大臣守之南

北戰伐咸據此爲勝負事詳紀中江乘地記云吳  
之石城猶楚之九疑也自江北而來山皆無石至

此山始有石因名石頭云 國朝都城皆據岡壠

之脊下有龍洞又名桃源洞舊志云東麓有虎踞

關山謂自鍾山西來疊嶂若門闕然今山形皆不

甚高何得與天闕比諸葛謂石頭虎踞故名山耳

後有駐馬坡諸葛亮嘗駐此以觀形勢唐李白詩

石頭巉巖如虎踞凌波欲過滄江去鍾山龍蟠走

勢來秀色橫分溧陽樹四十餘帝三百秋功名事

迹隨東流白馬小兒誰家子泰清之歲來關囚金陵昔時何杜哉席卷英豪天下來冠蓋散爲烟霧盡金輿玉座成寒灰扣劍悲鳴空咄嗟梁陳白骨亂如麻天子龍沉景陽井誰歌玉樹後庭花此地傷心不能道目下離離長春草遂爾長江萬里心他年來訪商山皓陶安詩鍊壁巉巖阨要衝古來設險大江東半天虎距山如舊萬壑鯨吞地更雄上國控臨吳楚郡西藩環護帝王宮當年駐馬坡前望想見金陵氣鬱葱

白土岡在鍾山南賀若弼進兵鍾山魯景達屯白土岡與弼旗鼓相對

武帳岡在石灰山側即古宣武城地宋文帝嘗開宴于此敕諸子且勿食至會所日旰食未至各有飢色帝戒之曰女曹少長豐佚不見百姓艱難今使爾識有飢苦知務節儉

謝公墩在半山寺

俗傳謝安所嘗登也其事無據李

白王安石皆有謝公墩詩白詩云冶城訪遺跡猶有謝公墩今求壽宮治城山即安與王羲之所登

悠然遐想之地安石雖有我屋公墩之句而又有  
詩云問樵樵不知問牧牧不言亦自疑之矣江左  
謝氏衣冠最盛謂之謝公豈獨安也今半山寺所  
在舊名康樂坊及墩名觀之恐是玄及其子孫所  
居後人因名之耳  
今冶城北二里有山亦名謝公  
墩山勢自鍾山來起伏曲折實城西北隅勝處近  
鞠爲蔬圃止存一徑土色赤亦呼爲紅土山據李  
詩集云冶城西北則此地近是

大江發源岷山合湘漢豫章諸水繞都城之西南經  
西北過鎮江東流入海隸府境者江之南上自慈  
姥浦下至下蜀港江北上自浮沙口下至東溝南  
二百里而遙北不及二百里即禹貢所謂中江亦  
名楊子江又名宣化江江之支流旁出其大者曰  
河小者曰港曰溝曰渡石激水曰磯水中可居處  
曰洲兩水之間曰夾縈迴者曰套水所注曰浦異  
時江泊石頭後漸徙而北今又漸南長老相傳南  
岸民居今當在北岸然尚去石頭十餘里也以此  
知陵谷變遷典籍難據茲特志其可知者慈姥浦

在城西南慈姥山下與太平當塗縣接舊志云慈姥港洩慈湖以東水入於江近港又有慈姥磯今曰和尚港東下爲鑣刀灣又東爲烈山乾道志云吳舊津所也四面峭絕下瞰大江商旅泊舟於此以避風宋晁無咎詩山如浮玉一峯立江似海門千頃開我欲此中成小隱莫教山脚有船來山之

下洲爲烈山洲港曰烈山港

伏滔北征賦謂之粟

洲以山形似粟因名又謂之溧洲世說云桓宣武在南洲與會稽王會於溧洲漾舟江側謝公亦在坐狂風忽起波浪洶湧非人力所制桓有懼色會稽亦微異惟謝怡然自若頃間風止桓問謝曰向那得不懼謝徐笑曰何有三才同盡理有磯突出

於湍間名曰亂石磯洲之東北是爲白鷺洲丹陽記云白鷺洲在縣西三里大江中多聚白鷺因名據今西關中街水環遶處當爲白鷺洲此特蒙其名耳非李白所詠也犢兒磯在南岸上接江寧河口下爲大勝河內合板橋浦李白有板橋浦懷謝眺詩新林浦舊志云浦在城西南二十里一名新

林港宋曹彬破南唐兵於新林港即此謝眺詩江路西南水歸流東北鶩天際識歸舟雲中辨江樹旅思倦遥遥孤遊昔已屢既懽懷祿情復協滄洲趣囂塵自茲隔賞心於此遇雖無玄豹姿終隱南山霧又發新林浦至京邑大江流日夜客心悲未央徒念關山近終知道路長秋河曙耿耿寒渚夜蒼蒼引領見京室宮雉正相望金波麗鳩鵲玉繩低建章驅車鼎門外思見昭丘陽馳暉不可接何況隔兩鄉風雲有鳥路江漢限無梁常恐鷹隼擊

時菊委秋霜寄言蔚羅者寥廓已高翔李白詩明發新林浦空吟謝眺詩暫行新林浦定醉金陵月爲一流吐納大江自大勝河以東有水數曲達於秣陵曰響水溝燈盞溝上新河次曰中新河次曰下新河國朝所開皆瀕江要地江北一帶稱險要者曰芝麻河曰穴子河曰王家套曰八字溝皆列墩瞭望又有長洲白沙洲梅子洲句容洲秀才洲火藥洲皆境江浦自下新河而東分爲三股一引石城橋一引江東橋一自草鞋夾以達於江名

曰三汊河夾之外爲道士洲上有屯駐處曰江心營近南爲護國洲中口洲自道士洲直抵北岸爲浦子口左右二水環抱縈迴名東西溝自東溝而下以達於瓜埠濱江之地以洲名者曰攔江洲工部洲官洲老洲柳洲趙家洲扁檐洲洲之東曰扁檐河其北曰滁河沿瓜埠鎮東南流以達於江江之名曰宣化漾有洲亦名新洲自是而下爲礬山山屹立中流石色白類礬故名又數里爲西溝近黃天蕩者爲東溝二水自江出皆折而西與儀真

縣接六合江境盡於此焉自中口洲而下有山踞江而出者曰焦家嘴又其下爲觀音山水曰觀音港有石臨瞰江水形如飛燕名曰燕子磯丹岩翠壁遠望如画江山勝處也磯上有漢壽亭侯關羽廟觀音閣俯江亭大觀亭水雲亭多名賢題詠由弘濟寺歷濤山唐家渡袁家河東陽港遂接黃天蕩中有洲屬上元其上爲草場自龍潭而東洲渚限隔有斜臈洲太子洲洲之外有老鴉夾又東爲天寧洲皆句容界其諸水分流有曰白家溝楊家

港雙溝港羅四港而邪溝尤為津要自此而下遂

與鎮江接江之中可紀者若此稽諸舊志多有不

合其今昔殊稱名存實亡者據舊志亦附入焉

砂夾 在西南七十里 馬家渡合興洲 西南九十五

里 龍潭洲 西南九十五里 馬昂洲 西北晉元帝渡

江牧馬處梁南康王會理率兵二萬至馬昂洲即

此 概洲 東北七十五里 茄子洲 西南十三里 蔡洲

西二十五里宋高祖破盧循即此 王安石送張拱

微詩子今涉東江船必泊蔡洲 雞距洲 西南三十

五里 烏沙洲 西南三十五里 楊林洲 西南二十五

里 木瓜洲 西南二十八里 浮洲 西南八十里 龍潭

洲 西南九十五里 鰻鰲洲 西南七十里 重雲洲 西

南十五里西有小江名澧江 丁翁洲 西南二十五

里 篳槍洲 西南三十五里 落星洲 見落星山 魚袋

洲 西南八十里形如佩魚因名 烏江洲 西南六十

里與烏江縣接 張公洲 西南五里 長命洲 石頭城

前梁武帝放生之所 查浦 石頭城南上十里 蚶蚩

磯 石頭城下唐書江台符上書陳民間利病十餘

條顯祖愛其才宋齊丘疾之使所親誘之痛飲沉

蚶蛟蟻下

蟹浦

西北十六里齊崔慧景軍敗走蟹

浦即此

新洲一名薛家洲與幕府山相對

即宋高

祖微時代荻處

迷子洲

西南四十里王安石詩迷

子山前漲一洲昔人圖志未編收是尚有迷子山

投書浦

石頭北晉殷羨為豫章守赴郡人多附書

至石頭渚以書擲水祝曰沉者自沉浮者自浮殷

洪喬非致書郵權德輿晚渡楊子江詩返照滿寒

流輕舟任搖漾文頤見千里烟景非一狀遠岫有

無中片帆風水上天青去鳥滅浦迴寒沙漲倒晚

疊秋風江空翻宿浪曾中千萬慮對此清曠迴

首碧雲深佳人不可望李白金陵望江詩漢江迥

萬里孤作九龍盤橫潰豁中國崔嵬非迅湍六帝

淪亡後三吳不足觀我君混區宇垂拱衆流安今

日任公子滄波罷釣竿

論曰自古國江南者皆以江為險曹操連兵百萬

而周瑜以偏師挫之赤壁魏文臨江鞠旅有天限

南北之語拓跋嘗至瓜步矣石虎嘗至歷陽矣符

堅嘗至淮淝矣皆敗衄而歸此皆阻於江而不得  
馳者也然孫吳據江而王濬直至建業陳人據江  
而韓擒虎宵渡采石江豈足盡恃哉顧守之何如  
耳

國家特設重臣專督操江而又有巡江御史往來經  
略其各府州縣有司巡徼若星羅碁布互相應援  
法亦可謂密矣日者劉賊竊發往來如无人之境  
而倭奴之警留都轟轟然且有隱憂焉此豈可不  
深圖之哉夫兵政廢弛乃思招募招募既多坐耗  
廩餼異時所養兵皆置之无用之地今東南財力  
竭矣於難用之中而求可用之實於養兵之內而  
寓息民之意是在深謀石畫之臣究心云

御河 國朝開在

大內東出青龍橋西出白虎橋至栢川橋與城濠合  
秦淮始皇用望氣者言鑿方山斷長壘以泄王氣其  
源二一出句容華山一出溧水東廬山合流入方  
山埭自通濟水門入於都城北經大中橋與城濠  
合西接淮青橋與青溪合南經武定橋而西又歷

鎮淮飲虹上下浮橋自三山水門出沿石城西北  
流以達於江或云本龍藏浦也支流屈曲不類人  
功惟方山西瀆屬土山三十里許是秦開六朝建  
都咸倚之爲固

唐杜牧詩烟籠寒水月籠沙夜泊秦淮近酒家商女不知亡國恨隔江猶唱後庭花

吳柵塘橫塘梁緣淮塘俱秦淮上見紀中

桃葉渡秦淮上今武定橋北

長樂渡秦淮上古朱雀航處今武定橋西

桐樹灣秦淮上今鎮淮橋稍東

舟子洲在秦淮上與桐樹灣近

汝南灣當秦淮曲折處汝南王渡江家於此

青溪吳赤烏中鑿自鍾山麓通城北塹以洩玄武湖水其流九曲達於秦淮後楊吳築城斷其流今白大平門城由潮溝南流入大內西出竹橋入濠而絕又自舊內旁周遶出淮青橋皆其故跡

運瀆吳鑿引秦淮抵倉城以通運道今自斗門橋南引秦淮北流至北乾道橋遂東經太平景定至內橋與青溪合北經昂新崇道橋又西連武衛橋從

鐵窓稜出城

潮溝吳鑿以引江潮東接青溪南抵秦淮西通運竇北連玄武湖按實錄云潮溝東發青溪西行經古承明廣莫大夏等門則今十八衛處也西極都城墻對歸善寺西南角南出則今雞籠山東也經閘闔西明門接運竇則今筮橋西北也據後湖水經大內城下流入竹橋者殆其故跡

南唐徐鉉詩潮溝橫趣北山阿宋張文定詩潮溝一面已生蒲即此

楊吳城濠楊溥城金陵時所開自北門橋東流歷珍

珠橋折南截于通濟城支流與秦淮合又自通濟門外西南流逶聚寶門外納重驛澗子諸橋水遂從西北至三山門復與秦淮合以達于江

珍珠河在成賢街南

金陵志云陳後主泛舟遇雨生

浮澗宮人指為珍珠因名此河通護龍河至太平橋西分兩派一派出柵寨門一派出秦淮據志言即運竇也恐非今自玄武湖繞國子監號房後達珍珠橋者為是大抵潮溝珍珠河二水皆引玄武湖合于秦淮後南唐築城遂絕其流今惟存西北

護龍河宋鑿即舊子城外三面濠今自昇平橋達于上元縣後至虹橋西南出大市橋而止

新開河宋元鑿自三山橋歷石城橋定淮諸門由草鞋夾以達于江又自三汊河而南過江東橋與元運道合

元運道在陰山下至元間開以通糧運由大城港入江

國朝城濠朝陽門外自西折於北

古漕河一名靖安河自靖安鎮下缺口取道入儀真

新河八十餘里

吳聿靖安河記畧曰江出岷山道

峽與荆湘沅澧至洞庭積為巨浸合沔水經潯陽

東連彭澤別為九道會為中江東北至南徐州為

北江入于海惟中江自湖口合流而下奔放蕩滴

吐吞日月山或磯之則其勢悍怒觸舞大艣兀若

轉梗至其廣處曠數百里斷岸相望僅若一髮而

舳艫上下中流遇風則四顧茫然亡所隱避自金

陵抵白砂其尤者為樂官山李家漾至急流濁港

口凡十有八處稱號老風波而玩險阻者至是鮮不袖手東南漕計歲失於此者什一二宣和六年發運使盧公訪其利病得古漕河于靖安鎮之下缺口謂其取逕道于青沙之夾趨北岸穿冊月港繇港尾越北小江入儀真新河以抵新城下往來之人高枕安流八十餘里以易大江百有五十里之險實爲萬世之利後之始興楊子六合上元分治之云

新河在白鷺洲西南流通大江二十餘里舊名蕃人

河今呼爲新開河

蘆門河在上元縣長寧鄉去縣六十里亦名蕃人河

景定志云蘆門河在蘆門漾之側建炎間始開以通真州今黃天蕩南王諫議蘆塲內是其處按韓世忠碑及建康年表似兀木自金山脫走之後沿江南岸引行先於黃天蕩南蘆塲鑿渠出江口以通建康而後又於冶城西南鑿渠出江故蘆門新開二河皆名蕃人河所謂蕃人者即四太子也南畿志云四太子河不知所在疑即此

竹篠港西至靖安東至石步南至直瀆北臨大江屬

縣金陵長寧兩鄉由靖安港口至城二十里由石

步港口至城四十里按竹篠港東連石步石步在

今長寧鄉而蘆門河亦云在長寧鄉今縣東北近

龍潭有河直達大江曰河口而誤呼竹篠爲竹簫

此志之可據者也然又云西至靖安南至直瀆靖

安近蘆龍山直瀆在直瀆山後不應有此數十里

但據蘆門河下所載則竹篠之在東北無疑

落馬澗在南五里東北流入城濠宋元凶劬敗人馬

墮水故名南史曰南澗元又呼躍馬澗今澗子竈

灣諸橋所跨是也

麾扇渡據史在朱雀航南則今秦淮上志云即毛公

渡者疑非

玄武湖在太平門外晉大興開創北湖築長堤以壅

北山之水宋元嘉中有黑龍見改今名一名蔣陵

湖一名秣陵湖一名後湖歷代相傳爲勝地趙宋

時廢爲田元大德中僅一池

國朝復爲湖以貯天下圖籍中有舊洲新洲龍引洲

蓮萼洲郭璞墓天語亭

顏延年觀北湖田詩周御

窮轍跡夏載歷山川蓄軫豈明懋善遊皆聖仙帝  
暉膺順動清蹕巡廣廡樓觀眺豐頴金駕映松山  
飛奔互流綴緹鼓代迴環神行埒浮景爭光溢中  
天開冬眷徂物殘悴迎化先陽陸團精氣陰谷曳  
寒烟攢素旣森藹積翠亦葱芊息響報嘉歲通急  
戒無年溫渥浹輿隸和惠屬後筵觀風久有作陳  
詩愧未妍疲弱謝凌遽取累非纏牽張正見詩上  
絕奢行樂滄池聊薄遊汎荷分蘭懼沉槎觸桂舟  
殘缸初度雨缺岸上新流欲知有高趣長楊送麥  
秋

燕雀湖一名前湖今爲

大內或云白蕩湖即此

窮神秘苑云梁昭明太子在

東宮有一琉璃盃紫玉杯乃武帝所賜既薨置梓  
宮後更塋開墳爲闈人携入大航有燕雀數萬擊  
之爲有司所縛乃獲二寶噐帝聞驚惋詔賜太孫  
封墳之際復有燕雀數萬啣土以增其上故名湖

迎檐湖在石城後五里晉南渡時衣冠南遷客王相

迎負檐於此今廢

張陣湖在石頭城相傳蘇峻與晉軍戰處

蘇峻湖在迎檐湖北本名白石陂即李陽斬蘇峻處  
穩船湖在佛寧門外洪武初開引江水瀦以泊舟

太子湖在鷄籠山北吳宣明太子所濬一名西池

夏駕湖在東南五十里即晉惠時石浮來處今廢

半陽湖在東北四十里江乘地記云東南有半湯泉

半冷半溫共同一壑

攝湖在攝山側

白米湖在東與句容下塘村接

三岡湖烏意湖西干湖俱在東

白社湖劉陽湖在東南

鎖石溪在東南四十八里源發白石巖經攝湖六十

餘里達于大江

長溪在東南六十里丹陽記云湖熟前有長溪受句

容赤山湖水入秦淮

謝靈運賦潭結綠而澄清瀨

揚白而載華飛急聲之瑟泊散輕文之漣羅始鏡  
底以如王終積岸而成沙

烏龍潭近清涼門相傳有烏龍見故名

天淵池在華林園亦名天泉池晉孝武太元七年大

旱井瀆皆竭供膳皆資天泉池明帝泰始二年天

泉池白魚躍入御舟梁武帝詩薄遊朱明節泛漾

天淵池舟楫互容與藻蘋相推移碧沚紅茵菖白

少青漣漪新枝拂舊石殘花落故池葉軟風易出

草密路難披

覆杯池在臺城內元帝以酒廢政王導諫之帝覆杯  
池中以為戒

濛汜池在臺城內晉張載賦麗華池之湛淡開重壤

以停源激通渠於千金承漚洛之長川挹洪流之

汪濊包素瀨之寒泉既乃北通醴泉東入紫宮左

面九市右帶閭風周墉建乎其表洋波迴乎其中

幽瀆傍集潛流獨注仰承河漢吐納雲霧綠以采

石殖以嘉樹水禽育而萬品珍魚產而無數蒼苔

汎濫脩條垂幹綠葉覆水玄蔭布岸紅蓮煒而秀

出繁葩絕以煥爛遊龍躍翼而上征翔鳳因儀而

下觀想白日之納光觀洪暉之皓肝於是天子乘

玉輦時遨遊排金門出千秋造綠池鏡清流翳華  
蓋以逍遙攬魚釣之所收纖緒挂而鱸鮓來芳餌  
沉而鰕鯉浮豐夥踰於巨壑信可樂以忘憂

善泉池在臺城東

梅花水在觀音門內與善寺源自石罅中出

醴泉在神樂觀末樂初醴泉湧出

勅右庶子胡廣撰文

玉兔泉在儒學二門內劉基有銘

舊志云秦檜未仕

時宿學夜見白兔入地使人掘之一丈許得泉因

名伯溫疑檜偽爲之銘曰嗚呼泉乎夫何辜爲檜  
所污世無吳隱之孰昭其誣嗚呼泉乎尼父大聖  
猶言其主瘠瘵與癰疽白兔之傳夫何傷於爾歟  
檜死爲蛆泉潔自如我作銘詩衆惑斯祛愚謂正  
使有此檜之惡益彰觀茲泉者未以爲鑒不可乎

寶公井在大市街

百丈泉在鐵塔寺

景陽井即陳後主避隋兵處當在今靈妃巷有文曰  
辱井在斯可不戒乎一名臙脂井

開善塘志云溉田二十頃 銅塘溉田二十頃 王塘溉

田三十頃 水門塘溉田十七頃 赤山塘溉田一百

餘頃詳見絳巖湖 長塘溉田一百頃 俱東南蠡湖

塘在西北 溉田十頃 劉塘在北溉田十頃 義溝瀆

在東 流入秦淮溉田十頃

論曰江南故多言水利比來堤壩不修每春夏之間彌望成川者皆膏沃壤也而陂塘灌輸之利日就湮塞國計民生烏得而不削哉

### 江寧

聚寶山在聚寶門外山產細石如瑪瑙其東為雨花

臺山麓有梅岡 李白詩鍾山抱金陵霸氣昔騰發

天開帝王居海色照宮闕群峯如逐鹿奔馬相馳

突江水九道來雲端遙明沒時遷大運去龍虎勢

休歇我來屬天清登覽窮楚越

戚家山在今大報恩寺後南唐時韓熙載嘗居此

梓桐山在南十五里舊有謝氏詩樓及翻經臺今址

尚存

紫巖山近梓桐山

夏侯山在南二十餘里梁夏侯叟愛其風景卜居云  
韓府山南十五里舊名鳳凰山以 韓憲王葬于此

故名

醜敵山以形名去夏侯山南二里許

牛首山在南三十里舊名牛頭雙峰秀起正對晉宣  
陽門王導指曰此天闕也故名天闕山又名仙窟  
山歷代崇飾甚盛由山椒起石級數百踏杉檜行  
列而上有白龜池虎跑泉南爲舍身臺臺之側懸  
巖突出曰兜率巖其下爲文殊洞又南有峯曰芙蓉

芙蓉其嶺曰雪梅山後有昭明太子飲馬池僅丈許  
冬夏不涸大峯之北有石如卧鼓中虛可坐數十  
人呼爲石鼓云天欲雨則石鼓自鳴折而西有石  
窟不測深淺名曰辟支洞即梁時建寺處山名仙  
窟以此

中有石盂形甚古唐神龍中并誌公嶽俱

取入長安

舊有中峯庵在西風嶺半近庵有龍王

泉甘冽可飲其東南爲劉宋郊壇處建炎中岳飛

設伏於此以拒兀术

韋莊詩牛頭見鶴林梯逕遠

幽谷春色浮山外天河宿殿陰傳燈無白日布地

有黃金休作狂歌者，何看不住心。

花巖山在牛首南五里西巖有石窟相傳唐貞觀間

僧法融居此有百鳥獻花之異故名山之頂曰芙

蓉峯有芙蓉閣大觀亭今餘址洞口歸雲亭小星

槎據山之勝處

陳沂芙蓉閣詩飛蘿懸碧嶂迴榭

入丹青閣暝慈雲結林晴瑞氣消日隨孤鳥盡心

共片岑遙佛座鳴清磬惟聞下界飄又宿小星槎

幽棲向飛閣高坐恍虛槎惚迴含星動闌回傍月

斜飄形御仙氣揮手拂天花未可投簪冕徒令羨

出家

祖堂山即花巖後以懶融故得名亦有石窟舊名幽

棲山按石中空洞處凡山皆有之而緇黃者流輒

指為仙佛之跡薦紳題詠亦誇張其事若誠然者

可歎也夫

岩山在牛首東北吳王皓刻石于此以紀功德後段

為三因名段石岡今石移置府學尊經閣內

上公山在段石岡南其東北為福子山又東為大山

小山皆相連

青山在牛首山南十里舊有幽岩寺

吉山在上村五峯聯峙宋建城侯吉翰墓山中故名

觀子山在南三十里上有水注新林浦一名觀山

大青山在觀山南十五里

紫雲山與花巖接一名大山

鼓吹山在南八十里宋孝武登此奏鼓吹故名

銅山在東南七十里山產銅故名

橫山在東南一百二十里接太平界四方望之皆橫

丹陽記云縣有橫山縣亘十餘里楚子重嘗至橫

山  
今花巖山麓亦名橫山

陰山在大城港晉王導立廟處今廢

湖山在南三十里上有湖大旱不涸

龍口山在西南七十二里縣志云三十五里以乾道

志為非然云前麓有三城湖而湖下復云七十三

里何其戾也今從乾道志

馬鞍山以形名在西南三十五里

車府山在西南四十里六朝藏車乘甲噐于此

落星山在板橋市西臨大江山之下有岡即王僧霸

連營以拒侯景處其近水者曰落星洲又曰落星  
磯陳顯達以數千人登落星岡新亭諸軍聞之奔  
還李白遇蓬池隱者脫紫綺裘換酒爲歡皆在此  
白都山在西南七十里白仲都嘗居此上有仲都祠  
白蕩山近白都山

龍山在西南九十五里

上三山在江寧鎮西

下三山在江寧鎮東三峯拱峙大江從西來勢如建  
瓴而此山突出當其衝一名護國山晉王濬伐吳

舟師過三山即此磯上舊有李溫叔祠今廢鮑照

詩泉源安首流川末澄遠波晨光被水族曉氣歇

林阿兩江漠平迥三山鬱駢羅南帆望越嶠北榜

指齊河關扁統天邑襟帶導京華長城非壑險峻

岨似荆芽攢樓貫白日搗堞隱丹霞征夫喜觀國

遊子遲見家流連入京引躑躅望鄉歌彌前歎景

促逾近勸路多偕萃猶如茲弘易將謂何謝朓晚

登三山望京邑詩灞漣望長安河陽視京縣白日

麗飛甍參差皆可見餘霞散成綺澄江淨如練喧

烏覆春洲雜英滿芳甸去矣方滯淫懷哉罷歡宴  
佳期悵何計淚下如流霰有情知望鄉誰能寘不  
變李白詩三山懷謝眺水澹望長安燕沒河陽縣  
秋江正北看盧龍霜氣冷鳩鵲月光寒耿耿憶瓊  
樹天涯寄一歡

慈姥山在西南一百一十里與太平接

天竺山在慈姥西唐有天竺僧居此故名東有水注

慈姥浦

土門岡在長干里即楊忠襄公死節處

金陵岡在龍灣相傳秦始皇埋金人于此書碣曰不  
在山前不在山後不在山南不在山北有人獲得  
富了一國殆以此地氣盛誘人鑿之耳其愚黔首  
若此而亡秦者泗上亭長余嗟夫祖龍之愚

鳳岡臺近鳳臺門

石子岡在梓桐山北又有小石子岡安德門外

大江境內諸水俱見上元

莫愁湖三山門外

吳融詩莫愁家住西城西月墜土星

沉家到迷一院無人春寂寂九原何處草凄凄香

魂未散烟籠水舞袖休翻柳拂堤蘭棹一移風雨  
急流鶯千萬莫長啼古今條錄莫愁在何處住在  
石城西艇子打兩漿催送莫愁來

三城湖龍口山下在今江寧鎮湖中舊有三小城因  
名

河湖在西南

石均湖筮湖銀湖俱在南

白都湖在白都山下

婁湖在東南十五里水流入艦澳吳張昭鑿昭封婁

侯故名宋時築為苑

梁墟湖高亭湖葛塘湖俱東南

艦澳在南十里水出婁湖入秦淮梁武開以藏船

江寧浦在西南七十五里源出太平當塗縣徐嗣徽

頓兵江寧浦陳霸先遣侯安都襲破之即此

牧馬浦在西南二十九里晉永和中置南朝放牧於

此

九里汀在東南五十里戚氏志云城南大路過郭公

橋長堤一道凡九里直達秣陵鎮吳末安山賊施

但及丁固諸葛靚逆于九里汀今俗呼九里埂

義井二一在石子岡唐保大間置一在報恩寺側李

迪鑿

雷山義井在德恩寺內闌上刻雷山義井篆畫甚古  
響井在陶吳鎮西北以紗帛蒙其上擊之作鼓聲投  
以瓦礫如鍾磬然闌上有元祐五年四字

鳳凰泉在鐵作坊內

保寧古井舊在保寧寺即今驍騎右衛倉門內鑿數  
十丈大旱不涸味甘美與鳳凰泉俱為都城第一

闌下有四鐵人里俗相傳為怪蓋緣下空闊恐易  
傾圮故以此承之無他異也

陳沂境內諸山考云

唐志稱東南名山衡廬茅蔣金陵有二馬蔣山故  
名鍾山實都邑之鎮武侯所謂鍾山龍蟠是也宋  
周應合山川序云鍾山之左自攝山臨沂雉亭衡  
陽以達於東又東為北山大城雲穴武岡以達于  
東南又南為土山張山青龍石碗天印彭城鴈門  
竹堂以達于南又南為聚寶戚家梓桐紫巖夏侯

天闕以達于西南綿亘至三山而止於大江所謂龍蟠之勢也鍾山之右近之爲覆舟雞籠在宮城之後又北爲直瀆大壯觀四望以達於西北又西北爲幕府盧龍馬鞍以達於西是爲石頭城亦止於江所謂虎踞之形也然考其山之遠近地之連脉亦少有不合者蓋東南之山關城重抱山勢連屬不可一一次序言之且古之江水自三山東入沿陰山石子岡北流以至於石頭又自石頭沿馬鞍四望盧龍幕府東折至於觀音又由臨沂攝山直抵京口二百餘里山勢不絕浮江而觀之三山據於西南石頭據於西北秦淮中出乃天限之門戶也今江水西流沙洲曠邈馬鞍鳳臺爲民居日削而陰山則陶冶爲澤漸不可尋矣此則圖其形勢之大者焉

諸水考云

金陵在大江東南自慈姥山至下蜀渡古稱天塹巨浸此江之境也秦鑿淮吳鑿青溪運瀆楊吳鑿城濠宋鑿護龍河宋元鑿新河

國朝開御河城濠今諸水交錯互流支脉靡辨據經考之自方山之岡壟兩涯北流西入通濟水門南經武定鎮淮飲虹三橋又西出三山水門沿石城以達於江者秦淮之故道也自太平城下由潮溝南流入

大內又西出竹橋入濠而絕又自舊內旁周繞出淮清橋合者青溪所存之一曲也自斗門橋西北經乾道太平諸橋東連內橋西連武衛橋者運瀆之故道也自北門橋東南至於大中橋截於通濟城

內旁入秦淮又自通濟城外與秦淮分流繞南經長干橋至於三山水門外與秦淮復合者楊吳之城濠也自昇平橋達於上元縣後至虹橋南接大市橋者護龍河之遺跡也自三山門外達於草鞋夾經江東橋出大城港與陰山運道合者皆新開河也東出青龍橋西出白虎橋至栢川橋入濠者今

大內之御河也若城外落馬澗諸水不能悉載焉論曰金陵諸水皆以江爲歸按其脉絡可考而知

也永樂時內河填塞嘗遣夫浚治頃湮廢日甚可  
以舟行者惟秦淮一曲而已餘皆漸成陸每遇霖  
雨街衢輒爲沮洳及今舊緒可尋疏鑿以通舟楫  
且引外河諸水朝宗京邑實利國利民之大者云

句容

茅山在縣東南四十五里初名句曲山又名巳山以  
山形類巳字也自漢永元間相傳有茅氏兄弟者  
學仙來止於此歷代崇信轉相附益於是山之岩  
谷泉石皆蒙其名顧事涉不經亡足採者茲特列

其名山三峰連峙最高者曰大茅峰王安石詩一

峯高出衆峯巔疑隔塵沙路幾千俯視烟雲來不

極仰攀蘿蕙去無前人間已換嘉平帝地上誰通

句曲天陳迹是非今草莽紛紛流俗尚師傳次曰

中茅峯又次曰小茅峯大峯之巔有泉曰天池大

旱不涸南垂泉流作乳色曰饋飲泉其下爲柏枝

壑壑之中曰華陽南洞張商英詩素虎班虬躡紫

烟幾看滄海變桑田赤城玉笥尋真後又到華陽

第八天又南爲茅洞其側曰衆真石又有曰黃龍

洞黑虎洞者在九錫牌左右有水自峯左支流縈  
紆達於菖蒲潭潭多生菖蒲九節可以長生一名

石墨池

王建送尺詩江城柳色海門烟欲到茅山

始下船知道君家當瀑布菖蒲潭在草堂前者曰

九曲澗潭之上爲華蓋岩其北垂方池數尺客至  
水即湧沸名曰喜客泉峯之北相連者曰抱朴峯  
相傳爲葛洪煉丹處東曰鸞輪峯西垂有泉二至  
冬一冰一溫曰玉蝶泉又有華蓋峯疊玉峯俱在  
大峯之東峯之下舊爲崇壽觀觀後有洞曰碧岩

東數武曰候仙居其下爲霧豹岩曲水穴出焉大  
峯中峯之間長阿連石曰積金峯故山有金壇金  
陵之號邑名由此起也梁時陶弘景居此東有橫  
壟石形甚瓌竒壁拆開成洞入數丈漸狹不復容  
人乃颺颺有風即所謂華陽西洞者由西洞而南  
又有玉柱洞中積石乳四旁徑容人跡壟之東南  
有水自石竇出曰鶴臺澗折而西又有楚王澗亦  
自石壁出以楚威王嘗遊憇于此故名峯之頂有  
靈泉有天窓洞其陰曰道祖峯東南一峯傑然秀

出與積金對峙者曰五雲峯中峯之東復有曰華陽洞僅作小石穴劣容人入有澗曰宜春有泉曰玉沙峯東北曰拱辰峪峪有百丈泉其西乃爲白雲峯水龍洞在其下自中峯至小峯長阿而西曰黑虎谷峯之北林壑幽邃春時花卉紛敷曰桃花崦顧况詩崦裏桃華逢女冠林間杏葉落仙壇老

人方受上清籙夜聽步虛山月寒其西有朱砂泉

泉上爲小青龍洞又有岡在峯側長緩而隱障名曰長隱岡又名伏龍岡岡皆細石東南近許長史

宅山之中復以山名者金菌山在積金東凹小山獨出如倉困之形西有羅姑洞趙孟頫詩九疑得

道女受事易遷家詩贈金條脫人逢鄂綠華高居

洞華姥山在丁公山南良常山在山北岳始皇東巡登此嘆曰巡狩之樂莫過山海自今以後良爲常也群臣竝稱壽曰良爲常矣遂名山其上有良常洞山志直山嶺南行二百步有始皇埋藏白壁一雙上有小盤石在嶺上以覆培處李斯刻書壁

上曰始皇聖德平草山河巡狩蒼州勒銘素壁

方隅山在良常東南三峯隅峙有燕口洞方隅洞  
龍尾山自大峯一嶺直至山東金壇界宛如卧龍  
四平山在大峯之西南下有洞穴曰方臺海江山  
慶雲洞之上其東爲碧玉岩岩下曰丹谷泉鬱岡  
山在小峯東北林木隱蔽望之鬱然亦名大橫山  
麻姑山在鬱岡西青山在鬱岡東三角山在華林  
峯北有皇甫峪海泉洞其北爲楂子谷三公山在  
燕口洞東雲堆山在皇甫峪南仙韭山在大峯西  
山多大韭俗呼石龍山驚足山在仙韭西大靈山  
小靈山竝在驚足西雷平山在伏龍之東周時有  
雷氏豢龍於此下有雷平池東南一里許有泉曰  
柳谷泉亦名柳汧顧況詩崦合桃花水窓分柳谷  
烟權德輿詩下馬荒郊日欲曛潺潺石溜靜中聞  
鳥啼花落無人處寂寞山窓掩白雲

伏龍山在柳

汧之間與中峰近即所謂伏龍之地在柳谷之西  
金壇之右可以高樓者也丁公山積金峯西麓丁  
山在拱辰峪東虎爪山在丁山西秦望山在良常  
北始皇亦駐此顧望丘阜啣珠山在雷平南獨公

山在小峯北小竹山在小峯東吳山在大峯南陶  
隱居云自大茅峯南仙韭山竹山吳山方山從此  
疊嶂達於吳興天目諸山矣

李德裕詩何地最脩

然華陽第八天松風清有露蘿口靜無烟乍警溪  
潭鶴時嘶玉樹蟬欲馳千里思唯戀鳳門泉杜荀鶴詩步步入山門仙家鳥徑分漁樵不到處麋鹿  
自成羣石面迸出水松頭穿破雲道人星月下相

次禮茅君

絳巖山西南三十里一名赭山地志云漢丹陽縣北  
有赭山其山丹赤故以名郡唐天寶中改絳巖今  
仍呼赤山也山頗險峻五季之亂鄉人避兵於此  
上有龍穴

華山北六十里梁武帝至此山開華山何如蔣山高  
薛對曰華山高九里似與蔣山等泉水倍多秦淮  
源出此

竹里山北六十里道塗傾側號曰翻車峴鮑照詩高

山絕雲霓深谷斷無光晝夜淪霧雨冬夏結寒霜  
淖坂既馬嶺磧路又羊腸畏塗疑旅人忌轍覆行

箱升岑望原陸四眺極川梁游子思故居離客遲

新鄉新知有客慰追故游子傷

劉牢之斬王恭帳

下督顏延宋武破吳甫之于竹里即此

花碌山北五十里舊產礬

五基山北五十里下有石穴初入甚狹丈許乃豁然

中設石塌

戍山北六十里相傳沈慶之戍守於此

青龍山南七十里一名洞山上有石窟

真誥云與華

陽相通

其中堂臺簾竈及仙人掌之屬俱以石狀

得名近時有入者見大青蛇因名青龍洞傍有峴

曰牧門

亦界溧陽

虎耳山東三十里舊名苦耳山有井聞人聲則沸名

沸井丹陽記云龍沸潭

撥雲山東四十里

秦山南三里麓有明月灣通秦淮舊傳謝安嘗垂釣

於此

甲山西南五十里峯巒競秀甲於左右諸山

射鳥山西北五十里湯水二泉其源皆出於此

白和山北七十里相傳仙人白和居此俗誤呼曰白  
婆山

瓦屋山南七十里丫頭山東南七十五里俱見溧陽  
崙山東北五十里

駒驪山東北六十里

吳諸葛恪獵見一小兒衆莫識  
恪引白澤圖曰南山間精如小兒名曰係囊

土石山龍山東三十里驤首山四十里塗山四十五  
里

彭山南七里周山三十五里仇山四十里石麓山白

馬山棠梨山白沙山石角山浮山俱七十里

姜石山西北二十五里嚴山五十里

亭山北三十里胄山三十五里

絳岩湖絳岩山下周百二十里下通秦淮界上兀句

容二縣漑田甚衆創於吳赤烏中歷代修築南史

沈瑀傳明帝復使築赤山塘所費減於官所量數

十萬唐麟德中令楊延嘉因梁故堤置後廢大曆

十三年令王聽復置周百里立二斗門以節旱澇

宋時湖禁尤嚴詳見湖條文多不載其畔有墩隱

士周如心結屋於上因名如心墩

江城湖西北六十里

周家湖南五十里今爲周干圩

蒲里溪南六十里源出浮山入絳巖湖

斗溪南七十里出瓦屋山入蒲里溪

龍淵溪南四十里出仇山入絳巖湖

高平后白二溪俱南出浮山入絳巖湖

官塘河東五十里東北流入丹徒

新河四十里源出駒驪山流入長塘湖注太湖

破岡瀆東南二十里吳鑿上下十四埭上七埭入延

陵界下七埭入江寧界晉宋齊如故梁堙之更開

上容瀆陳高祖復修破岡瀆至隋乃廢

龍潭北八十里臨大江今設巡檢司

清水潭龍潭鎮之西

下蜀港北六十里俗呼官港

陶隱居井

在茅山華陽宮前歲久湮沒政和初道士

莊慎修索而得之井闌上環刻大字云先生丹陽人使齊奉朝請壬申歲來山自號隱居

角里井譚家橋澗底相傳角里先生鍊丹於此井方圓凡十餘昔嘗有西域胡人飲水因取其土囊之而去莫知所以

義井坊郭東南隅唐李衛公屯兵於此所鑿

郭干塘茅山鄉其村亦名郭干

上鈴塘在南志云廣四十一畝溉田一百一十二畝

下鈴塘在南廣六十畝溉田二百二畝郭西塘在西

廣百八十畝溉田五百七畝南黃塘東北廣一百

畝溉田二百畝西黃塘東北廣十五畝溉田一百

五十畝西大陂塘上容鄉廣百畝溉田五百餘畝

### 溧陽

金雞山東十里

雲泉山東南三十五里上有泉出雲氣

鐵山東南五十里嘗產鐵今坑冶遺跡尚存唐書地理志云溧陽縣有鐵即其地

新婦山東南五十里

銅官山東南五十八里山產銅土中瑩然如麩狀唐

書地理志云溧陽縣有銅即此

三鶴山東南六十里相傳潘氏三人俱學仙於此化鶴而去今一名仙山

燕山南八里形如飛燕故名

錫華山南四十五里峯巒秀出爲登臨勝處一名小華山

石屋山南六十里建康志云吳王使歐冶子鑄劍于此今山西有鑄劍坑

鷄籠山以形名西南十二里

大石山西南十四里山麓有龍祠祠傍有龍池雲輦

應

盤白山西南四十里第二峯石上有仙人跡下有太

虛觀碑載盤白真人事

真人姓李名盤桓隴西咸

紀人避魏武之後隱居溧陽築室高邃峯之西

髮皤然故名盤白

俗呼曰觀山又曰高邃山

三玉山西南五十里相傳楚威王與眉間及并一客

同葬此

眉間尺干將之子

伍牙山西南六十里輿地廣記云子胥伐楚還吳經此一名獲牙山殆伍牙之誤建康志所載不經元

阿刺罕攻破銀樹東壩至護牙山敗宋兵即此

鐵洛山西南七十里輿地志云前代鑄錢處

青山西南七十里山巔有雲岫庵有溪北流入潮水

壩山西南七十五里

茨山西六里上有龍潭東邊石壁勢如削成宋丞相

趙葵嘗題其上

巖山西十里即晉咸和四年將軍李閔等追張健韓

晃處

姥山與巖山接

平陵山西三十五里春秋時吳移瀨渚于山下晉王

允之執蘇逸於此

黃山西四十里志云黃鶴仙人於此冲舉今山麓有

黃鶴池

芝山西八十里山產芝草相傳梅福嘗遊此

分界山西北八十里與溧水縣分界此山之頂

土山北三十五里一名獨秀山

雷公山三十七里俗傳雷公鑄劍於此

瓦屋山以形名北八十里唐李白詩朝登北湖亭遙

望瓦屋山天清白露下始覺秋風還即此

丫髻山北八十里兩峯相並如髻俗呼丫頭山

岳山東北二十五里洮湖之上風土記云昔有岳姥  
得道於此廣韻云岳鳥后切山名在溧陽寰宇記

云常潤等州分界此山之巔宋有巡司宋晦翁送

都巡舍人詩古寨依山麓頽垣近水湄有兵耕綠

野無盜弄潢池歲稔村村樂官閒事事宜我來無

所餽聊遺一聯詩元休遠詩岳姥峯高翠倚天洮

湖春水綠無邊不知楊柳薰葭外何處泊君書畫

船

大箬山小箬山洮湖之東

張汶山東北三十五里

落霞山東北四十里有聖塔院

屏風山庭子山辰山城子山南十里神山泉山二十

里嶠山二十五里金山氲里山結都山懸鼓山銀

方山五十里松山七十里

石門山西南十五里茅尖山十九里朝山呂長山二

十里桂林山二十三里宋汪藻記六南則翠巘晴

嵐與人相應接者桂林諸山也龍潭山荆山四十

里虎山五十里獨山六十里

秀山西七里姥山拔龍山十一里漁父山十五里烏山二十里谷山四十里

花山西北四十里翼山七十里曹山八十里

橫山北四十五里小山六十里黃金山七十里

落馬嶺南六十里伍子胥於此下馬試劒故名

金牛嶺南七十里茶曹嶺西南十七里胡冶嶺十九里頭陀嶺二十里高官嶺六十里

謝公渚北城下即謝公洗硯池采盧多遜詩園柳鳴

禽春色深江山可待謝公吟硯池香墨今餘幾欲

與君家寫四箴

謝婆渚南城下即宣城太守謝眺故宅

長蕩湖北二十里舊名洮湖其水東連震澤酈道元水經以此爲五湖之一虞翻亦曰太湖有五湖漏

湖洮湖射湖貴湖及太湖爲五湖中有山望之若

浮名浮山亦名大坏山周處風土記云洮湖中有

大坏山地理志云深陽有湖山陶隱居云石孤聳

以獨絕斷垂天而似浮

又有小坏山祥符圖經云

湖周廻一百二十里接金壇宜興界晉咸和四年蘇逸以萬餘人自延陵湖將入吳興又王恭兵潰走至長蕩湖即此

張籍詩一斛水中半斛魚言水

中多魚也

溧水一名瀨水西北四十里前漢地理志云溧水出南湖水北曰陽今宣城南湖正在固城湖北故曰溧陽也

投金瀨西北四十里伍子胥避難溧陽道中有女子擊繇瀨上子胥乞殮曰掩夫人壺漿女子投瀨死後子胥欲報德不知其家投金瀨水而去又謂之

金淵

黃山湖西三十七里黃山下周五十里

三塔湖西七十里周四十里一名梁成湖西南與昇平湖接俗云三塔滄

昇平湖西七十里水自五堰東流入湖又有溪水南自建平梅渚來會

瀨陽滄西北四十里

朱湖東南八里酈道元水經注云朱湖在溧陽

千里湖東十五里陸機云千里蓴羹未下鹽豉沈文

季云千里蓴羹豈關魯衛

百丈溝南三里一名百步溝源入燕山東流入白雲溪舊有壩三十四儲水以灌高田歲久淤塞弘治

初知縣楊榮開濬餘八百丈中存九壩民賴其利黃墟蕩南十里周五里東北流入白雲溪

縲車涇南十里上連黃墟蕩下屬白雲溪歲久淤塞成化間知縣熊達疏濬

高友溪南二十里源出廣德下經黃墟蕩合白雲溪舉善溪南三十里源出廣德東北入高友溪

香苗塘西南六里宋塘二十里廣三十五畝丁家塘

西六十里廣一百五十畝

葛涪滄西十五里周四十五甲西連新昌滄今成圩僅存一派可以通舟新昌滄西一十里

舊縣江西北四十五里水自分界入上興埠東流至南渡滄會

涇瀆北三十里

沙漲滄北十里

宋謝朓詩緩步遵海渚披襟帶蕙風

芙蓉舞輕帶包筍出芳叢浮雲自西北江海思無窮鳥去能傳響見我綠琴中

五堰西八十里堰即廣通鎮春秋時吳王闔閭伐楚用伍員計開河以運糧今尚名胥溪河及傍有伍

牙山云左氏襄三年楚伐吳克鳩茲

今蕪湖至於

衡山

今在烏程

哀十五年楚子西子期伐吳至桐

汭

今建平

蓋由此道自是河流相通東南連兩浙

西入大江後不知何時漸湮景福三年楊行密據

宣州孫儒圍之五月不解密將臺濛作魯陽五堰拖輕舸饋糧故軍得不困卒破儒魯陽者銀林分水等五堰壩左右是也壩西北有吳漕水言吳王行密所漕也至宋時不廢故高淳水易泄民多墾湖爲田者而蘇常湖三州承此下流水患特甚宜興人進士單錕採錢公輔議著吳中水利書以爲築五堰使宣歙金陵九陽江之水不入荆溪太湖則蘇常水勢十可殺其七八元祐中蘇軾稱其有水學并其書薦于朝時未及行阿刺罕敗宋兵實

出此道久之河流亦塞至 國朝定鼎金陵以蘇  
浙糧運自東壩入可避江險洪武二十五年復浚  
胥溪河建石閘啓閉命曰廣通鎮又於湖中開河  
一道鑿溧水臙脂岡引湖水會秦淮河入於江于  
是蘇浙經東壩直達金陵遷都北京運道廢希入  
震澤餘見高淳固城湖下

### 溧水

中山東十里孤聳不與群山接一名濁山輿地志云  
溧水縣濁山有濁水流演不息元和郡國志云山

出兔豪爲筆精妙

金陵志中山下既引輿地志爲

處而後又載濁山且云濁水出焉其錯繆類此

東廬山以形名東二十里有水源三一入秦淮一入  
馬沉港一自吳漕入丹陽湖相傳嚴子陵結廬于  
此

官山東二十五里山麓有大塘築堰以資灌溉一名  
官塘山

分界山東五十里見溧陽

馬鞍山東南十二里兩峯竝出以形似得名舊呼爲

溧陽山

石城山東南二十五里

圓峯山東南四十里泓水湛然曰龍池泉曰龍泉東復有水流注平陸

仙杏山東南四十三里上有杏林丹井及仙壇三所

一名仙壇山

芝山東南七十里有李子洞燕洞相去三百餘步田頽之亂邑人嘗避兵於此洞中又產石燕遇雨即飛晴則還落爲石

溧陽縣西亦有芝山不應兩芝山同一處所然所載事各殊姑兩存之

荆塘山南十里

贛船山南十二里山陰有青絲洞泉水澄清不涸南有張沈二士書堂遺址不知何時人一名感泉山社城山南十二里隋末杜伏威屯兵於此無想山南十八里上有韓熙載讀書堂

澳洞山西南二十五里上有潭禱雨多應

石羊山西南三十七里舊志云金華山即黃初平起石羊處有牧羊仙洞

銅山西南四十五里山產銅昔人嘗採之于此鑄冶  
李墅山東三十里浮山三十七里與茅山接烏龍山  
二十五里落步山三十五里

蘆塘山東南二十三里清洪山二十五里馬占山三  
十五里潁山五十里東破山五十五里

縣志又有靈嶽山方山荆山雲鶴山大山俱在六七十里外

據縣疆域東南至溧陽分界山五十里則諸山不  
得書又高淳志亦有荆山大山俱在疆域外似與  
縣分隸然志云在東南何也

土山南五十里紫雲山六十里東壘山六十五里王  
泉山一百一十里

丁公山西十二里琛山十五里稟丘山三十里左山  
四十里

岐山西北十五里靈龜山二十里梅山上義山四十  
里

愛景山北二十五里烏山與愛景接鷄籠山三十里  
麻山俱三十里

曹家岡花塘岡石子岡在東栗樹岡東南油鮫岡南

亭岡八里岡孔家岡俱南起龍岡臙脂岡即國

朝鑿河處俱西樓子岡薛家岡梁山岡三十里岡

薄落岡俱東北塔平岡西北

石臼湖西南四十里丹陽湖七十里舊有二派入龍

潭梅梁港經湯家埠通濁水此道昔湮塞今開通

臙脂河餘詳高淳

砂湖南六十里今開堰周迴五十畝

吳王漕水源出東廬山南流經白馬橋沉港下入丹

陽湖

龍潭西南二十里南通石臼湖北連臙脂河歲旱雩

有應

石龍潭南九里發源清洪山西北與秦淮合

蒲塘港南二十里還步港東南三十五里縣志云二

水俱自方山發源西流入石臼湖據金陵志方山

高十二丈周九里耳且在六十五里之外似未為

確

馬沉港東南三十七里自分界山發源西流入石臼

湖

花溪西南四十里

丁公澗南三十五里自丁公山流入膳脂河

冷水澗東南二十五里自荆塘山西流九曲入石臼湖

石湖澗西南三十里自琛山發源入石臼湖

膳脂河西十里

國初定鼎金陵欲通蘇浙糧運乃命崇山侯李新

鑿膳脂岡引石臼湖水會秦淮以入于江自來樂

時遷都運道廢

秦淮河見上元

稟丘泉在稟丘山

官塘上原鄉三十六畝草塘仙壇鄉三十畝土塘上

原鄉八十畝兩重塘白鹿鄉二十五畝

上方井西二十里上方寺井上有刻字云唐貞元記

相傳即孫鍾種瓜井

### 江浦

龍洞山西二十五里西接天井東連西華馬鞍定山

距任豐白馬孝義二鄉境上有泉洞故名

天井山西三十里上有石罅深不可測

西華山西一十五里

馬鞍山西十里山後有觀音洞

定山東北二十五里即六合縣之六合山屬縣者曰獅子峰其西南麓有卓錫泉後有湯溝泉餘具六

合志

舊志云其地有泉噴出若散珠故名東流一里合卓錫泉流入江

孟澤山西六十里

北大山紅石山俱西

青山西七十里下有青山寺

四潰山西南項羽敗走東城所從惟二十八騎依四

潰山爲圓陣一名四馬山

或曰漢軍四面圍羽羽

兵潰斬將故名

陰陵山西南四十五里

即項羽迷失道處

頰落山西南六十里

東龍山南四十五里上有祈澤壇

西龍山南四十五里與東龍山對

白子山南四十八里有異穴官鑿斷溝

黃悅嶺西北一十五里 國初新鑿通江淮東葛路

爲兩京通衢

駱駝嶺東北二十五里南通浦子口關西北通東葛

路

龍洞嶺西三十里東南通高望鎮北通香泉鎮

白篠嶺東華山北一十五里東通新路西通香泉鎮

石駝峯以形名傍有石岩豎如人狀俗呼石婆峯

浦子口河東二十里源出定山卓錫珍珠二泉由浦

子口西入江

沙河東三十里宋天禧間開引江水支流下至瓜埠

入江 舊志云范仲淹領漕時以大江風濤之險乃

開此河 國初新開路建沙河橋

新河東南新路西三里洪武間新開通江停泊舟

穴子河南四十里白馬鄉界南自大江通芝麻河石

蹟橋河水合流至西江口入江

芝麻河南六十里由大江入遵教諸鄉出西江口入

江

後河西北三十五里源出廬州舊梁縣至境內茅塘

橋東出瓜埠入江

八字溝渡東八里濱江

新江口渡東南三里江淮關口濱江與中新河對

西江口渡西南一十五里濱江

新河口渡西南一百里和州界濱江

浦子口渡浦子口城南

韋游溝渡和州舊志云在烏江東南二里

卓錫泉東北二十里定山寺山門之右舊志云宋劉

昌詩詠六峯有四水卓錫一水也梁時僧達磨晏

坐石岩思西域水以錫杖卓石遂得泉長流至定

山隴下台珍珠泉由浦子口河入江

湯溝泉北三十里北流入三汊河通於江

湯泉西南三十五里水温不寒有香氣昭明太子嘗

浴此呼爲太子泉至我

聖祖賜名香泉秦觀詩温井霜寒碧甃澄飛塵不動

玉奩清老翁僊去羸驂共太子東歸廢沼平據石

聊爲跋陀觀决渠還落堰溪聲浣腸灌頂雖殊事

一洗勞生病腦輕

東龍塘西龍塘俱遵教鄉

孤塘在狄家坪

### 六合

六合山在南六十里其峯六曰寒山獅子石人雙雞芙蓉高妙屹嶺拱合邑名由此起也張志和云真州六峯元時縣蓋屬真又有觀音巖達磨巖宴坐石虎跑泉白鼃泉珍珠泉晉置秦郡南朝王元初僭號齊伯生獲璽宋崔臯擊敗金人皆於此山

瓜步山在東南二十五里表裏江河據形勢之勝宋

鮑照稱其因迥爲高據絕管城王意侵宋鑿井與蟠道址尚存

李道傳按拓跋燕像即此唐獨孤

及詩蕪城西眺極蒼流漠漠春煙暗樹樓瓜步寒潮催建業蒜山晴日照揚州

靈巖山在東十五里南有偃月巖其下爲鳳凰臺又有鹿跑泉白龍池山之麓有澗產五色石名瑪瑙澗

冶山在東北五十里相傳吳王濞鑄錢之所上有天井白龍池鐵牛洞通臂泉

嘉定志云山嘗有僧思

蚩水一頭臨屈手觸山泉湧出其味如蜀

赤岸山在瓜步山東五里土色赤一名紅山南兖州

記赤岸山南臨江中濤水自海入江衝激六七百

里至此岸其勢始衰寰宇記赤岸若朝霞郭璞江

賦鼓洪濤于赤岸指此王維送封太守詩忽解羊

頭削聊馳熊首幡揚舫發夏口按節向吳門帆映

丹陽郭楓攢赤岸村百城多侯吏露冕一何尊

方山在東三十里宇文周置方州以此陳沈炯還至

方山自傷詩秦軍坑趙卒遂有一人生雖還舊鄉

里危心曾未平源比桐栢方山似削成猶疑北

虜騎向畏值胡兵空村餘拱木廢邑有頽城舊識

既已盡新知皆異名百年三萬日處處此傷情

橫山在東三十里拓跋魏置橫山縣宋建炎中劉綱

嘗保聚咸淳中施忠等立功俱在此

馬頭山在東北三十五里上有龍穴莫測深淺歲旱

雩有應

盤城山在南五十里有龍洞高原臨馬昌河

桃葉山在南六十里隋晉王廣伐陳駐兵於此開皇

初置興按桃葉晉王當是一山初名桃葉以廣屯  
兵故呼晉王耳通鑑一統志可據縣志云在西北  
疑是後人誤稱况晉王臨境伐陳豈百里外駐軍  
耶

宣化山在桃葉山西自盤城來下爲宣化鎮

埧山在宣化北

馬鞍山以形名在北二十五里宋畢再遇敗金人于  
此

牛頭山在東北五十里與治山接峯巒聳秀高入雲

表有泉西注爲冶浦

黃董山在東北三十五里又以形名屏山

符融山在東北三十五里嘉定志云秦符融嘗城此  
因名俗呼芙蓉者非但符融至淝水而敗安得築  
城於此

塔山去符融五里舊名疊層山唐貞觀中改今名

龍山以形名去西北五十里山之西一山連亘入來  
安曰西龍山

滁口山在南十八里臨滁河對城子山嘉定志稱爲

案山

行徑山在西南三十里其北爲牛齒坂

獨山在西北四十里上有湖

三山在西北六十五里界天長來安二邑竹鎮港之水出焉

唐公山在北五十里與冶山並

西陽山在東北二十五里吳沛山棧子山三十里蛾

眉山四十里桂子山四十五里尖山五十里

丁家山在南三十里埤山狹山五十五里

地龍山練山在西北三十里尉斗山盤石山巴山佛

子山烏石山麝香山四十五里趙家山五十里烽

火山六十里

城子山保得山在西南二十五里

摩尼峰在南二十里蓮花峰三十里

蜀岡在東北三十里南接儀真東連江都綿亘數十

里一名崑崙岡

鮑照賦云軸以崑岡指此相傳地

脉通蜀故名其說本朱紫陽又南唐後主好蜀紙

既得蜀工使行境內惟六合之水類蜀則地脉之

說容有之也

李鐵岡在北二里白塔岡松林岡俱三十里  
達子凹在瓜步山東金人嘗伏兵於此故名

天井凹在北三十里

泰山墩在東二里鐵牛墩東北三十五里

青絲墩在北三里

滁河在西南發源故梁縣經滁和界會五十四流入  
縣境分爲三亦名三汊河經東南三十餘里至瓜  
步入江唐書淮南道大川首滁吳淦塘晉淦中宋

時金元屢犯滁口即此

冶浦河在東二里北通天長南入滁河

皂河在西北三十里濁河四十餘里皆自北合滁河  
西河在長蘆鎮范文正領東南漕計始開又名沙河  
馬昌河在南五十里南與滁河合

河子溝在東南二十五里古稱急流江今名急水溝  
淳熙初開新河即此

岳子河在河子溝北兀木駐瓜步岳飛遣子雲鑿此  
以襲虜俗呼鴨子河

東溝水近長蘆紹興間淮南運判沈調開以艤舟

芳草澗在東北三里通沈家湖橫塘入冶浦河

唐韋

應物詩青青滿地鋪顏色曲曲一溪流水聲總謂

遊人逞風景亂雲初捲碧天空

冷泛澗近張家山

惜水灣在東南十五里縈迴曲折即今大小長灣宋

隆興間鑿其灣曰過盤洋

陳里港在南二十五里東接瓜步西入揚子江元諶

巡檢司于此

黃湖港在西北十五里程家港西南二十里梁家港

在西南三十里俱入滁河

石脚灘在滁河東水中多石故名宋紹興間嘗造浮

橋于此以達瓦梁

瓜步渡在瓜步山前唐淮南節度張延賞始以渡屬

揚州

周庾信詩校尉始辭國樓船欲渡河輜軒臨

積岸旌節映江沱觀濤想惟蓋爭長憶干戈雖同

燕市泣猶聽趙津歌唐駱賓王詩捧檄辭幽徑鳴

榔下貴洲驚濤疑躍馬積氣似連牛月迥黃沙淨

風急江秋不學浮雲影他鄉空滯流

宣化渡在宣化山陽晉三王南奔渡處

回軍渡在東南二十里嘉定志宋太祖以舟師伐南唐於瓜步振旅凱還因名

新渡口在西南三十五里宋樂四年知縣王翺通滁六道今名姜家渡

菖蒲蕩在滁河側

龍池在南五里水清可鑑有兩島淵邃莫測相傳神龍居之舟行風濤輒作宋政和中雲有應今池畔有慈惠龍王廟

瓦梁堰西南五十里北齊嘗置郡金元屯兵于此

劉城堰在東五里南接崇岡中築城

茆城堰在高岡上與劉城堰相對

草塘在西五里中有墩溉田甚廣

劉塘在東三十里

賈襄塘在東南二十里塔山塘在東北三十里

冶山井在大聖寺有章武二年字

高亭

鎮山縣原為高亭鎮山曰以名山白石曰湖南迤邐

而來聚脉於此今縣治移其下

學山東一里先為朝元觀後徙儒學於下因名

馬鞍山東二十里鳳棲山並石臼湖相傳鳳凰嘗棲

其上二十五里橫山三十里大游山三十七里遊

子山四十里遮軍山五十里山北有水入固城湖

城門山五十里大山六十里有水入固城湖經五

堰東入溧陽三塔港荆山六十里縣界至溧水縣

四十里自遊子山下疑當分隸詳具溧水志中

秀山東南三十里舊傳有仙過以鞭畫路形如之字

今見存

禪林山東南二十五里秀山三十里花山六十里

東龍岡竹墩岡在東桃花岡在東南上土墩九十九

花犇岡西北

丹陽湖西南三十里中流與當塗縣分界東連石臼

固城二湖其源有三出縣者為舒泉出廣德白

石山者為桐水出溧水東廬山者為吳漕水三湖

匯合其流分二一西出蕪湖一北出當塗姑孰俱

出江左傳哀公十九年楚子西子朝伐吳及相納

杜鵑註云中城尺德

南有桐水出白石山西

入丹陽湖指此唐李白嘗遊此湖愛其風景每張  
帆載酒縱意往來有詩湖與元氣運風波浩難止  
天外賈客歸雲間片帆起龜遊蓮葉上鳥入蘆花  
裏少婦掉輕舟歌聲逐流水

石臼湖西二十里與當塗溧水分界湖內有軍山塔  
子馬頭雀壘四山

固城湖西南五里杜通石臼丹陽二湖與當塗宣城  
分界湖東有廣通鎮壩壩外有河築五堰設閘啓  
閉導湖水由常州宜興入太湖後因蘇常水患乃  
以石室五堰液鉄以銅石洪武間復疏通之以便  
蘇常松浙糧運永樂元年蘇常被水乃築壩設官  
管理湖水遂不入太湖

論曰廣通鎮壩者所以障宣歙金陵姑孰廣德及  
大江之水使不入震澤也前代若蘇軾單錡及  
國朝吳相五周文襄皆議築五堰以成蘇常陸海之  
饒其為壩下諸郡者善矣第隄防一築水勢日壅  
淳之口將凡為湖者紀極也嘉靖戊戌覈田

致虛懸米八千夫田  
涖而賦額不減淳民之  
困可不思所以蘇之哉

橫溪在東牛兒港於家港東溪俱南蘆溪煉溪俱西  
北官溪河龍潭灣月潭灣俱西王母瀾在東

論曰金陵山水秦時望氣者已指巽之矣歷千餘  
年而

聖祖龍興神鼎奠焉始皇之所不能泄六朝之所不  
能有至是始際其運豈天固許之以俟夫帝者之  
興歟不然何其盛也

列聖相承教化涵育一時名賢輩出熙鴻名而垂茂  
實先後彬彬焉詩云思皇多士生此王國王國克  
生維周之禎信矣哉